



13
1787
35



13
1787
35



進士依親 弘治六年戶部題為存省京儲事該本部覆准進士甲第在前者量留各衙門辦事取選其餘放回依親正德十二年進士馬津等奏該本部覆准嘉靖五年進士應櫛等奏奉旨不必放回十七年奉 詔書進士選期遠者照例放回依親限一年以裏赴部近年無行進士奏願就教者題授府教授仍照原甲第品級支俸考選庶吉士 永樂二年始選進士楊相等為庶吉士就文淵閣進學宣德九年奉旨馬愉等都著在翰林院比二十八宿月給燈鈔二十貫以後或間科一選或連科屢選或數科不選或合三科同選或重閣殿試卷取選或限年三十五以下或不限年其考期先期內閣題准本部同禮部赴東閣會同內閣輔臣考官於東閣前題目由內閣題請 欽命取中者由內閣封進

欽定讀書已經三年例該內閣查平日考校名次重加考試
取分上中卷封進欽定本部照例上卷二甲授編修三
甲檢討中卷科
道部屬或外補

東宮官屬 舊例銓設詹事少詹至校書正字俱會同內閣推舉多係兼職其通事舍人二員例取序班選任

急缺行取 正德三年本部查得缺多人少將歷俸二年以上行人中書取選推官知縣先年題准事例於進士舉人出身歷任三年之上曾經給由年三十以上五十以下者詢訪行取後因缺多人少扣俸將及三年有考薦優異的雖未經考滿都准查取 行取官陸續到齊具本定日考選本下除行取在南與在外官先已見部外本司行行人司太常寺國子監中書舍人各衙門限俸起送見堂納卷次日赴部聽考本部出題不拘疏

議論策一篇考畢封定次日日本部先將與選官過堂選科訖司務親往朝房請都察院至會同復過堂選道各過臺址跪念說帖選科念後面跪的是午門外坐更將軍來奏昨夜二更一點有鑰匙四把遞出當時遞進引來奏知選道念監察御史臣某欽蒙往差浙江等處公幹事完回復命臣有題本進奏本文冊送科畢部院堂官退坐穿堂本部將原封卷當面拆開同看本司開具與選官單除未及三十并五十以上其年貌相應與查訪堪任者擬或科或道或才堪別用俱本部正堂筆註司官隨查缺帖赴正堂火房填訖當日寫本封進弘治十年本部議將舊進士辦事二年以上者行取嘉靖十一年奉旨進士還照祖制授職後習知民事積有年勞的照例行取著為令 行取知縣投文到部文選司行戶部該司查完過錢糧分數不及分數者不准

舉用人才 累朝薦舉人才詔旨天順元年廷臣奏薦江西處士吳與弼欽差行人徵聘至京欽授左春坊左諭德自陳老疾辭免奉旨准辭仍遣行人送歸賜詔褒嘉成化八年都御史朱英奏薦廣東舉人陳獻章起送到京陳乞有疾終養欽授翰林院檢討候親終疾愈仍來供職弘治年儒士潘辰以廷臣薦舉欽授翰林院待詔歷官太常寺卿嘉靖二年生員文徵明以巡撫薦八年儒士葉幼學以輔臣薦俱授待詔

一聖賢後裔弘治十八年衢州知府沈杰妻衢州孔氏嫡派子孫照朱熹子孫也授五經博士江西臨得曾質粹係曾子後佳照類孟二氏例世襲翰林院五經博士

揀選官員 成化二年該本部題准朝覲考察後各處府州縣同知等官缺多合符在聽選舉人限上選三年以上歲貢六年

以上揀選以後每遇會試後本司示限入揀年分舉貢各某年起各具通狀於三月初旬投司查明先期題請大約擬選人數舉人二分歲貢一分司揀倍取然後堂揀俱年貌器度相應當日列名示知納卷彌封赴堂考試照序舉人選同知知州通判推官知縣歲貢選通判推官知縣州縣佐貳

會推大臣 內閣大學士吏部尚書多係特旨簡用其有命下廷推者本部請該與推官赴闕會推 兩京太常卿少府尹丞光祿卿少理少寺丞左右通政鴻臚卿少尚寶卿少俱先題缺本部推舉二員簡用詹事府及兩京翰林缺官掌印俱從內閣推舉本部補本題知兩京祭酒員缺舊例本部自行推舉嘉靖十四年奉旨照巡撫都御史例會官推舉本下劄付到任

推陞方面 左布政缺於右擬補例不陪推布政司左右布政
 左右叅政左右叅議按察司按察使副使僉事俱兩司挨次互
 轉其行太僕寺卿少卿運使知府同知并兩京各衙門資俸相
 應者相兼推補布按二司除右布轉左無陪外其餘與行太僕
 苑馬卿少卿每缺推二員數缺可共一本知府無陪與運使雖
 有陪不可與二司同本布政司官用照會其餘用劄付其提學
 管糧巡海兵備管屯等官各行該部請勅一降調官員方面有
 才力只堪簡僻無按官各據堪任
 地方具奏到部酌量題覆改調

起用官員正德十六年詔書弘治十八年以後正德十六年以
 前在京在外大小官員有因守正被害去任降調充軍為民及
 日陳致仕等項各該衙門查明具奏起復原職酌量陞用起用
 事例

除考察官員外不分退休罪廢或由撫按科道各衙門薦到
 覆或由本部題請酌量起用有徑從請成復任原職者有不
 原職隨宜
 起用者

丁憂起復官員 在京堂上科道部寺及在外方面官俱稽勲
 司單付隨缺題補係南京者改除北闕其餘府同知京府通判
 以下及在京首領等官俱稽勲司兩月類付收入急選隆慶四
 年本部題准府佐貳州縣正官隨付題補不俟急選如先丁憂
 後遇考察降調改教者仍入急選凡官吏丁憂京官奏具關領
 內府孝字號勘合吏典人等
 劄付順天府給引照回在外官吏人等移文知會所在官司給
 引回還移文原籍體勘明白以聞喪日為始不計開二十七箇
 月為滿少一月者提問
 匿喪者為民今革職

官員給假 京官省親祭祖遷葬各奏請給假查例題覆舊例
 量地方定限違限一年之上住俸五箇月一年半之上送問舊

例歷俸六年以上方許給假省親十年以上祭祖近年省親祭
祖者六年之上遷葬三年之上送親送子及進士畢姻者不拘
過遠憑限 在外赴任官員舊例水程無行裁革只依硃限到
任如有過遠憑內硃限者各該撫按照例參到題覆仍咨行各
該撫按其違限半年之上革職為民隆慶二年御史顧廷對條
陳該本部覆准州縣正官最為親民今後推陞除補務要嚴限
赴任不得枉道回籍過遠憑限者聽各該巡按參奏照朝覲回
任例一月之上問罪兩月之上送部別用三月之上罷職不敘
監司不舉同罪給假水程南北直隸河南山東山西陝西俱兩
月浙江江西福建湖廣俱二月廣東廣西雲南貴州四川俱四
月

陸除文憑 大選文憑印號完備本司主事請堂印到吏科用
號印候吏科定限送到錄限登簿用堂印押本司判給其急選
及就教官員本部用號印送吏科定限在京陞外者各官親領
并應天府所屬文憑俱本部釘封咨送都察院轉送兵
部發行南京京官徑咨兵部付南京公差人順齋各回關轉發
日期註簿查考各憑字號大選官員文字號其餘推陞急選俱
急字號

考課

考索考課之法上矣舜典曰三載考績三考黜陟幽明

如縣之績用弗

成必待九載而後見至成周而計吏之法益詳焉歲終考歲會月終考月
要日終考日成又三歲有大計之治九載有黜陟之方詔王廢

置則掌之太宰大計誅賞又掌之太宰是亦足矣至小宰又以

六計弊群吏廉善廉能廉敬廉正廉法廉辨宰夫以八職掌官府正師司徒府史胥徒聽

國計於司會計吏治於司書有小司徒以攷其治成有內史以

逆其會計大抵皆統於太宰功罪能否舉以告王而升黜之此

周制之善也漢興課吏之際猶有古意郡守得自辟除王尊為

太守察舉補鹽官長焦延壽令長得自課第令長歲書計戶

為部史太守察舉補小黃令御史得課郡國守相刺史巡行所部郡國考而丞相

丞相之要又其課吏皆每事而考韓延壽在東郡斷獄為天下

最此刑獄課也尹翁歸守右扶風盜賊課嘗為三輔最此盜賊

課也倪寬為內史稅租不入當免後民爭輸租而更以最此租

課也卜式為成臯令將漕最此漕運課也陳立為天水太守勸

農桑為天下最此農桑課也後志注曰令長歲盡計縣戶口墾

田錢穀盜賊上其簿於郡課校其功則戶口墾田錢穀亦各有

課也元帝時京房作考功課吏之法令晉灼所列者令丞尉以

盜賊除罪之科爾其法非止此也然而不覺盜三日者坐之則

繩下過急矣三國魏明帝時劉邵作都官攷課之法七十二條

大畧欲使親人之吏以功次補郡守就秩賜爵其法得矣而使

州縣察士必以四科則取士之路亦狹矣惟晉杜預之言曰古

者黜陟定於心不泥於法末世疑心而信耳目疑耳目而信簡

書簡書愈繁官愈偽莫若委任達官各攷所統於是立六優六

劣之法優多劣少者平敘劣多優少者左遷法簡而易行然必

以六歲乃一按馬故時病不能行也唐吏部置考功郎中員外

郎各一人京官之考則郎中主之外官之考則員外主之而又

有監中外官考使以准督其事凡百官之長歲較其屬之功過

州牧刺史縣令每歲亦上其狀於考司監領之官差以九等大

合衆而讀而唱第於尚書而後奏之凡考課有四善德義清謹

二十七最獻可替否近侍之最銓衡人物選司之最揚清激濁

推鞠得情法官之最訓導有方學官之最賞罰嚴明將軍之最

辭理兼舉文史之最牧養肥碩牧官之最邊境清肅鎮防之最

等一最四善爲上上一最三善爲上中一最二善爲上下一無

最而有二善者次之無最而有一善者又次之善最不聞者斯

爲下矣詳於德而畧於才唐法猶可嘉焉宋乾德四年詔曰惟

彼銓衡止憑資歷慮有英俊沉于下僚自今常調赴集選人委

吏部取南曹取歷任中多課績而無闕失者具名送中書門下

引驗量才甄敘開寶九年詔諸道轉運使各察舉部內知州通

判監臨物務京朝官等以三科第其能否政績尤異者爲上恪

居官次職務粗治者爲中臨事弛慢所蒞無狀者爲下歲終以

聞將大行誅賞焉太宗詔置內殿崇班在供奉之上左右侍禁

在殿直之上以供奉殿直有四十年不遷者故特置崇班侍禁

之直以次授之興國六年詔群臣掌事于外州悉給以御前印

紙所貴善惡無隱殿最必書雍熙二年詔右諫議大夫雷德驤

同知京朝官考課令其錄履歷功過之狀引對既得漸識群臣

可以擇才委任且使有官政者樂以召對有瑕累者耻於顧問

可以懲勸矣真宗定三年考課磨勘進秩之制命有司考其殿

最臨軒黜陟之

今審官院磨勘京朝官功

景德元年詔諸路轉運使副察所

部官吏能否辨為三等公勤廉幹文武可取利益於國惠及於

民者為上幹事而無廉譽清白而無治聲者為次畏懦而貪慢

公不治賊狀未露濫聲頗彰者為下並列狀以聞紹聖二年尚

書省言今增損諸轉運提刑提舉官合上簿七事一舉官二勸

農桑三招流亡四興利除害五按察吏部賊罪六內置獄及平

反獄訟七機察賊盜並開具互申都司都司限兩月開具申尚

書省紹興六年侍御史周祕言國家以十五事考校監司以四

善四最考校守令保奏有限遠限不實者有罪

吏部職掌考功司京官考滿 例該本衙門掌印官開送考語

到部以憑覆考嘉靖四十二年該本部題准京官五品以下不

待九年通理但遇三六年給由該衙門堂上官務要據實填註

稱職平常不稱職三等考語都察院及本部覆考賢者備他日

之用否者每年黜其尤一二人以警官邪京官年七十以上無

論三九六年考滿俱不考覈行令致仕係堂上官仍奏請定奪

惟欽天監例不致仕

京官九年通考初考平常次今考稱職從稱職初次考稱職今

考平常亦從稱職初考稱職次今考平常從平常初今考平常

次考稱職亦從平常但在兩京官俱作事繁稱職無過陞二等

有過前除亦陞二等有過陞一等平常無過陞一等有過前除

陞一等有過本等用

考察事例 年老有疾者俱致仕貪酷者俱為民罷輒無為素

行不謹者俱冠帶閑任浮躁淺露才力不及者俱降一級調外
任內年老有疾老疾三項序列

考察事宜

堂審起數一起翰林院詹事府

無堂官

國子監二起

通政司大理寺三起光祿寺鴻臚尚寶太常太僕大醫已上俱
五品以下堂上官有諭德庶子川堂先見其餘俱不叫名由廊
大詹下見四起本部司廳五六科六戶部七禮部八兵部九刑
部十工部十一都察院十二大理寺十三中書科十四行人司
十五宗人府五府錦衣衛經歷通政司經歷知事并詹事府主
簿等官十六翰林院侍詔孔目典籍并四夷館帶俸官十七光
祿典簿錄事四署官十八太常典簿博士協律贊禮郎司樂奉
祀等官十九太僕主簿庫官鴻臚主簿鳴贊序班署丞帶俸等

官二十國子監丞典籍博士助教學正學錄典籍掌饌等官

二十一順天府治中通判推官經歷知事檢校司獄教授訓

導宛平大興知縣等官二十二上林監丞典簿四署官二十三
五城兵馬司武學二十四五府并所屬及兵部屬衛所經歷吏
目并收糧經歷二十五起太醫院御醫至支俸官已上用叫名
單逐起先點齊二門外伺候臨審各另出牌上寫衙門起數隨
牌進審 有司考績洪武三十五年令有司官三六年考滿
到部考覈稱職平常者俱復任九年通考不稱職者依例降用
隆慶二年該本部題准三六九年考滿官到部照舊例分別稱
職平常不稱職三等不得槩考稱職該河南道鍾沂題考職覈
外官一款該本部題准奏留方面府佐及府州縣正官給由者

聽撫按考覈賢否具奏其牌冊差人齎繳到部本部再加考覈
總候雙月另本題請就彼復職其平常不稱職者另行議取不
得濫給恩典

布按二司堂上官考滿別無考覈衙門布政司官咨送都察院
考覈按察司官徑赴都察院考覈俱本部覆考行太僕寺苑馬
寺卿丞官考滿別無考覈衙門本寺徑呈本部咨都察院考本
部覆考仍行兵部稽其所養馬數陞降各處鹽運司官員考滿
俱本司正官考覈兩淮河間長蘆徑具由赴部咨都察院考覈
本部覆考山東兩浙福建河東陝運司并各處市舶鹽課提舉
司俱由布按二司考覈申部覆考不送都察院仍各行戶部稽
考錢糧明白至日發落府州正官考佐貳首領并屬州縣衛所

大小官縣正官考佐貳首領屬官各省者俱經由布按二司考
覈到部本司覆考直隸府州縣等官無上司所轄并按察司首
領官俱送河南道考本司覆考在外九年考滿官查審功績及
有無過名并三六年曾否給由定擬該降本等用品級明白附
簿送文選司搭選內該陞降者本司具本其本等用者俱文選
司具本其三六年考滿官俱付文選司領憑復任請給恩典者
查冊引奏復職及准繳牌冊有無被劾回付驗封司

繁簡則例在外府州縣以錢糧府十五萬石以上州七萬石以
上縣三萬石以上或親臨王府都布按二司并有軍馬守禦路
當驛遞邊方衝要供給去處俱爲事繁若府州縣錢糧在十五
萬七萬三萬石之下僻靜去處爲事簡永樂四年奏准各都司

集卷七
衛所布按二司行太僕寺鹽運司鹽課提舉司煎鹽提舉市舶
提舉司茶馬司考覈俱從繁例宜撫安撫招討長官司俱係土
官衙門從簡例今外衛首領亦從簡例

查覆舉劾被劾考察通例年老有疾者致仕罷軟無為及素行
不謹者冠帶閑住資酷并在逃者為民才力不及者酌量調用
隆慶三年詔書內一款凡官員犯有賊私者務行提問的實各
下贓盡數行追并入官該武英殿大學士張條陳守令貪污顯
著者不必引例發遣但將所犯贓嚴行追併押發各邊自行輸
納完日發回原籍為民

朝覲事宜 天下諸司官員每三年一次例該朝覲除市舶提
舉司外浙江等布政司按察司順天應天所屬及直隸各府州
縣運鹽使司行太僕寺苑馬寺鹽課提舉司官各帶首領官連
一員名各布政司仍帶理問一員上林苑監各署及各處土官
衙門官吏各一員名茶馬司吏一名若裁減去處首領官帶該
吏一名各照原降到任須知依式攢造文冊具本親齎奏繳以
憑查考其來朝官員俱儘正官如正官到任未及三箇月方許
以次佐貳官不得越次各官離任之後雖有陞調別故亦要赴
京畢事不許擅離改委其地方遠近各照原定水程日期不許
預先離任曠廢職業各該衙門先將應朝官吏姓名并起程日
期并申本部限九月以裡到部其各該官吏俱限十二月十五
日起至二十五日以裏到京違限者陸續參奏其來朝官員服
色品級花樣照依欽定樣製務要新潔其跟隨皂隸司府官六

名州縣官四名各首領官二名不許多帶人役脚力盤纏聽撫按衙門斟量道路遠近計算停當定與數目於無礙官錢支用不許私自馳驛及分外科擾隆慶四年該吏科都光懋等題議行各撫按所屬地方如兩廣見在用兵要見某府州縣事勢危急必不可缺正官其各省府無拘邊腹地方果有災傷賊情日須賑濟保障者量留正官數員此外一切零剝小災及兩廣不用兵郡縣保要依期入覲

大明會典事例洪武十一年令官員來朝察其言行功能第爲三等稱職而無過者爲上賜坐而宴有過稱職者爲中宴而不坐有過而不稱職者爲下不預宴序立於門宴者出然後退永樂七年奉旨汶上縣知縣史誠賦役均平撫民有方翰林院寫勅書陞他做濟寧州知州仍掌縣事禮部差人將着酒一尊鈔一千貫織金紗衣一套去賞他

朝覲條件 先年十一月具題應該來朝衙門并合行事宜通行知會取職名限九月以裏到部次年正月具題行各該撫按等官取所屬賢否考語限八月以裏差人送部三月內具題來朝官不許科擾交通及不許諸人挾詐榜諭禁約六月內各都察院查催賢否文冊以便類總見部投文日期十七日浙江江西十八日福建河南十九日山東陝西二十日山西四川二十一日廣東南直二十二日湖廣廣西二十三日雲南貴州二十四日北直行太僕寺苑馬考察分省日期初二日浙江江西初三日福建河南初四日山東陝西初五日山西四川初六日廣

東南直初七日湖廣廣西初八日雲南貴州北直各行太僕寺
苑馬寺今太僕苑馬隨各省初九日

恩蔭

考索臯陶稱舜曰賞延于世是時有世賞未有世官周武王泰
誓始有官人以世之說康王戒畢公曰世祿之家鮮克由禮春
秋桓三年書尹氏宣十年書崔氏譏世卿也漢興諸侯皆以嫡
子襲爵邠漢龔勝免策曰其上子若孫同產若同產子一人各
除爲郎是漢法唯得任其子若孫同產若子而已漢儀云二千
石以上親事滿三歲得任子弟擇其茂廉者補令丞九卿得任子弟爲卿
劉向以父任爲郎以行脩飾遷諫大夫是漢法既任而復有所
決擇此法之善也唐而任子之法益詳矣禮部簡試太廟齋郎

以五品已上子孫及六品職事并清官子爲之郊社齋郎以六
品職事官子爲之文資也皆讀經粗通擇儀狀端正者兵部簡
試千牛備身及太子千牛武資也補親衛勳衛羽衛者皆五品
已上之子若孫也藝祖初定任子之法臺省六品諸司五品必
嘗登朝歷兩任然後得請不請者則不補矣太宗淳化始因改
元恩霽文班中書舍人武班太將軍以上並許蔭補如遇轉品
即許更蔭一子而奏薦之廣自止矣至道二年始有壽寧節推
恩之令則聖節奏薦自此爲例真宗大中祥符元年始有東封
禮畢推恩之令則郊禋奏薦自此爲例前朝患之累常裁定聖
節奏薦自嘉祐元年罷今唯郊禋如故至于致仕遺表之恩凡
子之皆特典也

唐書李德裕太和相吉甫子卓犖有大節不喜與諸生試有司以蔭補校書郎德裕云朝官須公卿子弟為之何者少習其業日熟朝廷臺閣之儀不教而自成

宋史盧多遜為相子雍起家即授水部員外郎後遂為常呂蒙

正奏曰臣忝甲科及第釋褐止授九品京官况天下才能老於

巖穴不能需寸祿者多矣今臣男始離襁褓膚此寵命乞以臣

舊日及第時所受官補之自是止授九品京官太宗三年時宋白梁周翰各奏

姪男克永定陵挽郎臣維有外甥王諫臣殊有堂弟詢欲望克求定陵挽郎上從之

吏部職掌大臣恩蔭大臣嫡長子孫先任中書舍人改授尚

寶司丞者弘治十四年大學士徐溥長孫文煥嘉靖十年桂萼

長男輿十八年張敷敬長男遜業二十三年李時長男鑛各改

尚寶司司丞徐文煥弟文燦桂輿弟輻遜業弟遜膚李鑛弟鑛

各補蔭中書舍人隆慶二年該本部題准官恩生歷俸六年以

上才堪民牧方陞知府其次量陞運司同知五年太學士高題

議雲南兩廣皆稱絕徼所當生養撫輯知府係一方之主不宜

輕授今後官生出身六七品以上者許得陞部署及京府治中

太僕寺寺丞等官使果稱職便當陞轉知府藩臬不必遠方又

稱職又當陞陞不必限制弁山堂國朝重科目一途任子多不得大位獨燕府左長史朱忠定公復

蔭子崇憲公肅至北京行部尚書禮部左侍郎儀文簡公智蔭子忠襄銘至太子太保兵部尚書學士呂文懿公原蔭子憲至

南京太常寺卿少詹事劉文恭公鉉蔭子榮至太常寺卿掌尚寶司浙江按察副使陶公成蔭子魯至湖廣右布政使工部右

侍郎黃文毅公孔昭蔭孫第至禮部尚書江西按察副使許忠節公達蔭子瑒至錦衣衛指揮使管衛事都察院右副都御史

孫忠烈公遂蔭子堪至都督僉事又蔭孫鉅至都督同知皆品秩過其所自

張江陵居正十二年考滿勅諭元輔卿親受先帝遺囑輔朕

十四年四海昇平四夷賓服實賴卿匡弼之功精忠大勲 朕言不能述官不能酬茲歷十五年考績特於常典之外賜銀二百兩坐蟒蟒衣各一襲歲加祿米二百石薄示褒眷先生其欽承之該吏禮二部疏上加上柱國太傅支伯爵俸蔭子尚寶司丞給四代誥命仍賜勅獎諭錫宴禮部疏辭上柱國伯爵俸而巳

會典 國初因前代蔭子之制文官一品至七品皆得蔭一子以世其祿後乃漸為限制在京三品以上滿考著職方得請蔭謂之官生出自 特恩者不限官品謂之恩生或即與職事或送監讀書 凡蔭敘洪武年定用蔭者以嫡長子如廢疾立嫡長子之子孫曾玄同如無立嫡長子同母弟曾玄同如無立

繼室所生如無立次室所生如無嗣者傍蔭其親兄弟各及子

孫如無傍蔭伯叔及其子孫

凡敘蔭遞降洪武年定用蔭者孫降子曾孫降孫及傍蔭者皆於合

敘品從降一等守

成化年奏准在京三品以上官員聽令一人送監

讀書出身若大臣果有勲勞 特旨錄用其子孫者不在此限又題准應得錄蔭者吏部查無過犯被劾方與題請或曾經被劾而公論稱屈及不礙行檢者具奏定奪

凡東宮講讀舊臣正德年令備查祖父年勞已及三年送中書舍人習字出身未及三年送國子監讀書又令東宮侍班官三年蔭一子送監讀書

凡文武官死於忠諫者正德年詔蔭一子送監讀書 休致

漢書武帝時董仲舒病致仕朝廷每有大議數遣廷尉張湯至陋巷問其得失於是決獄三百三十一事動以經對

漢宣帝朝丞相常賢以老病乞骸骨賜黃金百斤安車駟馬罷就第丞相致仕自賢始

世說蜀先主街張裕不遜燕忿其漏言下獄將誅之諸葛武侯

表請其罪先主答教曰芳蘭當門不得不鉏蜀志裕字南和蜀郡人明曉占候而

天才過於周辟嘗私語人歲在庚子天下當易代劉氏祚盡矣主公得益州九年之後寅卯之間當失後皆如言裕甚精相術每舉鏡視面自知刑死未嘗不撲之於地

殷中軍被廢在信安終日恒書空作字揚州吏民尋義逐之竊視惟作咄咄怪事四字而已殷中軍廢後恨簡文曰上人箸百百尺樓上儋梯將去

梁武每集文士策經史事時范雲沈約之徒皆引短推長帝悅加其賞賚會策錦被事成言已罄帝試呼問劉孝標劉時貧悴冗散忽請紙筆疏十餘事坐客皆驚帝不覺失色自是惡之不復引見及孝標類苑成帝即命諸學士撰華林徧畧以高之竟不見用劉乃著辨命論以寄懷

唐書李德裕貶崖州經鬼門關賦詩云一去一萬里千知千不還崖州在何處生渡鬼門關交趾有鬼門關其南多瘴厲去者罕得生還諺曰鬼門關十人去九不還唐司空圖王官谷作亭曰休休量才一宜休揣分二宜休耄而曠三宜休自號耐辱居士又曰休休莫莫伎倆雖多性靈惡

湘山野錄盧多遜貶朱崖諫議大夫李符求見趙普言珠崖雖在海外而水土無他惡春州雖在內地而至者必死望改前命

以外彰寬宥乃寘必死之地普頷之月餘符坐事貶宣州上怒未已令再貶嶺外普述其事貶春州月餘卒

世說范忠宣謫永州夫人不如意輒罵章惇舟過橘州大風雨船破僅得及岸平正持蓋公自負夫人以登燎衣民舍公顧曰豈亦章惇所為耶

石林燕語太中祥符五年王清昭應宮成王魏公為首相始命充使宮觀置使自此始然每為見任宰相兼職天聖七年呂申公為相時朝廷崇奉之意稍緩因上表請罷使名自是宰相不復兼使康定元年李若谷罷叅知政事留京以資政殿大學為提舉自此始自是學士制誥皆得為提舉因以為優閑不任事之職熙寧初先帝患四方士大夫年高者多疲老不可寄委罷

之則傷恩留之則玩政遂仍舊宮觀名而增杭州洞霄及五嶽廟等並依西京崇福宮置管勾或提舉官以知州資序人充不復限以員數故人皆得以自便

野記洪武己未冬詔致仕官居鄉與人敘坐惟於宗族外祖及妻家敘尊卑若延宴則設別席不得坐無官之下如致仕官胥會則敘爵爵同則序齒其與異姓無官者相見不次答禮庶民則以古禮謁見敢有凌侮者論如律著為令此外殊不然不知何時弛也又允明記先公云 國朝之制三品致仕理事與見任同今亦不知所出也

科目

考索王制命鄉論秀士升之司徒曰選士司徒論選士之秀者

而升之學曰俊士升於司徒者不征於鄉升於學者不征於司徒曰造士大樂正論造士之秀者以告於王而升諸司馬曰進士司馬辨論官材論進士之賢者以告於王而定其論論定而後官之任官然後爵之位定然後祿之鄉大夫論述鄉學之士才德穎出者升於司徒司徒考試之量才而用之為鄉遂之吏曰選士其有才德又穎出於選士者不安於小成願升於國學者司徒則免鄉之徭役及升國學則并免司徒之役

周禮地官鄉大夫三年則大比考其德行道義而興賢者能者鄉老及鄉大夫群吏獻賢能之書於王王再拜受之登于天府秦自孝公納商鞅策仕進之途惟闕田與勝敵而已漢文十五年詔舉賢良方正能直言極諫者武帝元光元年令群國舉孝廉各一人四年徵吏民有明當時之務習先聖之術者縣次續

食令與計偕元封二年詔舉茂材異等可為將相使絕國者章

帝建初元年始復用前漢丞相故事以四科辟士呂東萊云漢取其行之久在學校則有明經在郡國則有孝廉賢良茂才魏文帝立九品中正法黃初三年

始除漢限年之制令郡國貢舉儒通經術吏達文法則皆試用

東晉元帝制揚州歲舉二人諸州各一人宋制丹陽吳會稽吳

興四郡歲舉二人餘郡各一人九州秀才郡孝廉至皆策試天

子或親臨之齊尚書郎都令史駱宰議策秀才格五問並得為

上三四為中二為下一不合與第孔氏雜說射策與對策不同按蕭望之以射策甲科為郎

射謂難問疑義書于策量其大小署為甲乙之科不使彰顯射者隨其所得而釋之對者顯問以政事經義觀其所對文詞定

高梁天監七年州置州重郡置郡崇鄉置鄉豪各一人專典搜

薦北齊選舉多沿後魏之制九州縣皆置中正其課試之法中

書策秀才集書院考貢士考功郎中策廉良天子常服乘輿出
 坐於朝堂中楹秀孝各以班草對字有濫誤者呼起立席後書
 有濫劣者飲墨水一升文理孟浪者奪席脫容刀隋煬帝始置
 進士科唐貢士之法多循隋制上郡歲三人中郡歲二人下郡
 一人有才能者無常數其常貢之科有秀才有明經有進士有
 明法有書有算其天子自詔者曰制舉武后天授元年二月策
 貢士於洛城殿前貢士殿試自此始唐永徽以前俊秀二科猶
 由文學舉於有司者竟集於進士之列由是趙修開元二十五
 剛去俊秀故曰進士登科記記之名立始於此年立明經開義進士試經法三試皆通為第一進士有甲乙二
 科德宗二年趙贊以箴論表贊代詩賦宋初每歲放榜取士極
 少乃安德裕作魁日九人而已有賢良有宏詞有進士數科皆

足以得人進士為盛開寶六年因徐士廉訴知舉李昉不公帝
 御武英殿覆試親試自此始及第人釋褐皆賜祿袍靴笏賜宴
 賜詩自興國二年呂蒙正榜始賜及第人賜宴就瓊林苑自興
 國八年宋白榜始分甲次賜同進士出身亦自是宋白玉世則
 榜始唱名自雍熙二年梁顥榜始封印考卷自咸平三年始置
 謄錄院彌封官覆考編排皆自祥符八年間始廷試以詔策咨
 訪治道上御集英殿以策試自熙寧三年始
 禮射義古者天子之制諸侯歲獻貢士於天子天子試之於射
 宮漢時科目人知有甲科乙科而不知又有
 丙科儒林傳景科補文學掌故景即丙也
 漢書夏侯勝曰士病不明經術經術苟明取青紫如俛拾地芥
 耳經術不明不如歸耕揮犀士人應敵文章多用他人議
 論時語曰問即不知用則不錯

漢制賢良明古今政事之體受策察問咸以書對著之于篇朕親覽焉漢武帝策子大夫褒然為舉首

晉書泰始中郗詵舉賢能射策為天下第一武帝問卿才何如詵曰猶桂林一枝崑山片玉陳元老及第詩桃花先透三層浪

月桂高攀第一枝

北史杜正玄舉秀才試策高第楊素怒曰周孔更生尚不得為秀才刺舉何忽妄舉此人乃以策抵地使擬司馬相如上林賦

等五篇素讀數遍大驚曰誠好秀才隋時重舉秀才天下不十人而杜正倫一門三秀才

隋書張從師祖攢之隋大業中進士甲科位至侍御史諸曹員外郎攢之生法以碩學麗藻名動京師亦舉進士自監察御史

為會稽令

李肇國史補進士科始隋大業中盛於貞觀永徽之際縉紳雖

位極人臣不由進士者終不為美以至歲貢恒不減八九百其

推重謂之白衣公卿又曰一品白衫其艱難謂之三十老明經

五十少進士

進士為時所尚久矣由此出者終身為文人其通稱為秀才投

刺鄉貢得第曰前進士互相欽敬曰先輩俱捷曰同年有司曰

座主造請權要曰關節開元中考試功員外郎李昂主俊秀科昂性剛急集貢士曰文之美惡悉知之矣

如有請托當悉黜之既而昂外舅薦李權於昂昂怒召權庭數之又斥權章向之規權曰鄙文不藏已聞命矣執事詩云耳臨清渭洗心向白雲爾今天子春秋鼎盛不揖遜於下而洗耳何哉昂訴於執政朝廷以郎官權輕自是改用禮侍郎

撫言唐太宗貞觀中私幸端門見進士綴行而出喜曰天下英

雄入吾彀中天時人語曰太宗皇帝真長策賺得英雄盡白頭

凡進士入試遇題名有家諱卽託疾下野息狀進士祀主文家諱雖音同字不同亦不敢入試如崔夢殷知舉以父名龜從則歸仁澤不敢試

舊唐書薛登疏古之取士考素行之原詢鄉曲之譽樂禮遜明節義以朴厚爲先彫文爲後方今舉士明詔方下固已驅馳府寺之廷出入王公之道陳篇希息奏記誓報故俗號舉人皆稱貢舉竟是自求之稱未是人知之詞

盧氏雜說曹制舉人試日既暮許燒燭三條常永貽詩三條燭盡鐘初動九轉丹成鼎未開殘月漸低人擾擾不知誰是謫仙才權德輿戲云三條燭盡燒殘舉子之心一舉子答曰四韻賦成驚破侍郎之膽

南部新書大中九年日官李景亮奏云文星暗科場當有事沈詢爲禮部甚懼焉至是三科盡覆試宏詞趙拒等皆落史郎裴諗除祭酒

懿宗咸通四年進士皮日休上疏請以孟子爲學科曰臣聞聖人之道不過乎經經之降者不過乎史史之降者不過乎子子不異乎道者孟子也今國家有業莊列之書者亦登於科其誘善也則深而懸科也未正伏望命有司去莊列之書以孟子爲主

項安世擬策夫科目之盛自李唐起而唐之取士猶未盡出於此也有上書而得官如和逢堯員半千之類是也有隱逸而召用如陽城李渤之類是也有出於辟舉如韓愈之出於張建封董普是也有出於延譽者如吳武陵之薦杜牧之是也唐之士奉刺再

拜以謬於典客者投其所為之文名曰求知已如是不問則再
如前所為名曰溫券如是而又不問則有執贄於馬前自贄曰
某人上
謁者

國史補唐設博學宏詞科選舉志國初立宏詞拔萃科紹聖立
服勤詞學科大觀改詞學兼茂才科紹熙改博學宏詞科

韓愈荅崔立之僕聞禮部有以博學宏詞選者人尤謂之才退
因取所試讀之乃類於俳優者之辭顏忸怩而心不寧者數月

李平叔云洪景伯兄弟應博學宏詞以克敵多銘為題洪惘然
不知所出有巡捕老卒覩于案間以問洪曰官人欲知之否洪

笑曰非而所知卒曰不然我本韓太尉世忠之部曲從軍日見
有人以神臂弓舊樣獻于太尉太尉令如其制度製以進御賜

名克敵并以歲月告之洪盡用其語首云紹興戊午五月大將
云云主文大以驚喜是歲遂中科目若有神助焉此蓋熙寧中

西人李宏中創造因內侍張若水獻于 裕陵者也

中吳紀聞吳士孫發嘗舉百篇科故皮日休贈以詩云百篇官
體喧金屋一日官衙下玉除陸龜蒙亦有云直應天授與詩情

百詠唯消一日成其見推於當時如此此科不知創於何代初
亦無定制惟求應者即命試太平興國五年有趙昌國願試此

科帝御殿出四句詩為題詩云松風雪月天花竹鶴雲烟詩酒
春池兩山僧道柳泉每題五篇篇四韻至晚僅成十首方欲激

勸後學特賜及第仍詔今後應此科者約此題為式

宋朝事實集賢殿唱第日皇帝臨軒宰臣進三名卷子讀於御
按前用牙篋點讀畢宰臣折視姓名則曰某人閣門則承之以

傳于階下衛士凡六七十人皆齊聲傳其名而呼之謂之臚傳亦謂遠殿唱名後狀元獨班謝恩第二名第三名次為一班一甲唱名畢則往西廊角取勅黃執之勅黃用蜀中麻紙兩幅連粘大書某人等宜賜某等科第其可滿子又長於勅黃一尺自狀元至第二甲終皆曰宜賜進士及第自第三甲至第四甲皆曰宜賜進士出身第五甲則曰宜賜同進士出身甲內人齊則謝恩便賜食相身為袍各設位賦詩以答皇恩唱第五甲畢士人皆執勅黃再拜殿上傳曰賜進士袍笏積於殿外南廡下出爭取之皆不暇脫白襪加綠袍於上焉燕賜淡黃絹衫一領淡黃帶子一條綠羅公服一領笏一面及第為正奏名第一狀元承事郎第二榜眼第三探花文林郎第四第五人從仕郎第六人

至五甲終並迪功郎

恩科人為特奏名第一等前二名附正奏五甲授迪功郎餘並登仕郎第二等京府

助教第三等上州文學第四等下州文學並侯郊出官第五等諸州助教止得勅黃袍笏題名小錄以別試

所為之大魁入局點差局中職事官謀請掌器掌酒果監門之屬三狀元常宿于局中月餘而罷局局中所幹專以題名小錄為事黃甲者由省中降下唱名畢以此升甲之人以手卷末用黃紙書之謂之黃甲是日貢院設香案於庭下狀元引五甲內士人拜香案禮部亦遣官來贊導置黃甲於按中而望闕引拜拜黃甲畢人列兩廡四十以上東廡四十以下西廡內擇一人最年高者上堂大魁拜之年高者答拜又擇一人最年少者上堂拜大魁亦答拜而退謂之敘同年

南部新書新進士放榜後翼日排光範門候見宰相雖云排光範門實排建福門集於四方館昔有詩曰華陽觀裏鐘聲禁建福門前鼓動時此即其日也

宋朝引試率在八月中韓魏公當國日二蘇將就試黃門忽卧病魏公輒奏上曰今歲召制科之士惟蘇軾蘇轍最有聲望今聞轍偶病未可試欲展限以俟上許之黃門病中魏公每使人問訊既聞全安方引試比常例展二十日自後試科目並在九月後相國呂微仲語及科目何故延至秋末東坡爲呂公言之呂曰韓忠獻其賢如此

宋朝舊制殿試皆有黜落臨時取旨或三人取一或二人取一或三人取二故有累經省試取中屢擯棄於殿試者張元遂以積忿降元昊爲中國大患於是羣臣建議歸咎於殿試黜落嘉祐二年三月辛巳詔進士與殿試者皆不黜落迄今不改是因一叛逆賊子爲士子無窮之利也

制科分五等上一二等皆虛惟以下三等取人然中選者亦皆第四等獨吳正肅入第三等至嘉祐中蘇子瞻子由乃始皆入第三等已而子由言太直爲考官胡武平所駁欲黜落復降爲第四等設科以來止正肅與子瞻入第三等而已故子瞻謝啓云誤占久虛之等其後有范百祿李廔亦皆入三等楊升菴曰制科入三等者終宋世僅五人而蜀居其四蓋二蘇李范皆蜀人也

呂氏家傳呂公著知貢舉密奏曰天子臨軒策士而用詩賦非舉賢求治之意今來廷試乞出自宸衷惟以詔策咨訪治道自是上臨軒以策試進士

代醉編富公以茂材異等登科後召試館職以不習詩賦求免

仁宗特命試以策論後遂為故事制科不試詩賦自富公始至蘇子瞻又去策止試論三篇熙寧初罷制舉其事皆廢

故事南省奏名第一殿試唱過三名不及則必越眾抗聲自陳雖考校在下列必得升等吳春卿歐陽文忠皆由是得升第一甲獨范景仁避不肯言等輩屢趣之皆不應至十九人方及徐出拜命而退時人服其靜退自是廷試當自陳者多效慕之其後科舉當升等人其目不一有司皆預編次唱名即舉行其風遂絕

古今詩話禮部貢院試進士設香案於階前試官與舉人對拜此唐故事也列坐設位供帳亦盛乃具茶湯至於試院學究則撤去席幕亦無茶湯渴則飲硯水皆黔其吻非固閑之蓋防穢

幕中藏文字供應人傳義耳故歐公詩云焚香答進士撤幕待諸生

撫言昭宗天復元年赦文令中書門下選擇新及第進士中有久在名場才沾科級年齒已高者不拘常例各授一官於是禮部侍郎杜德祥奏棟到新及第進士陳光問年六十九曹松年五十四王希禹年七十三柯崇年六十四鄭希顏年五十九詔光問松希禹可秘書省正字崇希顏可太子校書時為此舉為五老榜

主試

唐書貞觀中考功員外郎王師旦知貢舉時冀州進士張昌齡王公瑾並有俊才聲振京邑而師旦考其文策全下舉朝不知

所以及奏等第太宗怪無昌齡等名因召師旦問之對曰此輩誠有文華然體性輕薄文章浮艷必不成令器臣若擢之恐後生相效有變陛下風雅帝以為名言後並如其言開元以考功

後貢舉於禮部以侍郎主之侍郎親故移試考功謂之別頭

科舉記貞元八年陸贄主司試明水賦御溝新柳詩其人賈稜

陳羽歐陽詹李博馮宿王涯張季友齊孝若劉遵古許季同侯

繼穆贄韓愈李絳温商庾承宣員結胡諒崔群邢昺裴光輔萬

是年一榜多天下名雋備傑之士號龍虎榜南部唐大中以來禮部放榜有姓氏

稀僻者曰榜花

唐餘錄崔羣自中書舍人知貢舉歸其妻李氏因暇常勸樹庄

田以為子孫之業笑曰子有美庄良田遍在天下夫人何憂夫

人曰不聞君有此業羣曰吾前歲放春榜三十人豈非良田耶

夫人曰若然者君非陸贄相門生乎曰然夫人曰往年君掌文

柄使人約其子簡札不令就試如君以為良田即陸氏一庄荒

矣

因話錄李宗閔為中書舍人典貢舉門生多清秀俊茂唐冲薛

庠袁都等時謂之玉笋謝廷浩以詞賦著名號錦繡堆

南部新書杜審權大中十二年知貢舉放盧處權有獻之曰座

主審權門生處權可謂權不失權又乾符二年崔沆放崔溘譚

者稱座主門生沆溘一氣

大中元年魏扶知禮闈入貢院題詩曰梧桐葉落滿庭陰鏤閉

朱門試院深曾是昔年辛苦地不將今日負前心牒出為無名

名子削為五言以譏之

鄭薰侍郎主文悞以顏標為魯公後乃取之時舉子曰主司頭腦大冬烘錯認

顏標作魯公

劉虛白昔與裴坦常同視席及公主文虛白猶是舉子試雜文日簾前獻絕云二十年前此夜中一舩燈燭一舩風不知歲月能多少猶著麻衣待至公

見開錄放榜後狀元以下到主司庭謝名曰謝衣鉢衣鉢謂得主司名第其或主司先人同名第即謝大衣鉢也

撫言唐末禮部知貢舉有得程文優者即以已登第時名次處之不以甲乙為高下也謂之傳衣鉢和凝登第名在十三後得范魯公質遂處以十三其後范登相位官至太子太傅封國於魯與凝皆同世以為異也有獻詩云從此廟堂添故事登庸衣

鉢亦相傳

楊大年為翰林學士一日會鄉里待試者或云學士必持文衡幸預有以教之作色而入曰不休哉是年

用不休皆中選

歸田錄裴皞官至禮部尚書放三榜四人拜相桑維翰竇正固張礪馬裔孫清泰二年馬裔孫知貢舉纔放榜謝恩引諸生詣座主宅謁拜裴公以詩示之曰宦途最重是文衡天與愚夫著

盛名三主禮闈年八十門生門下見門生

唐楊嗣復領貢舉父於陵入朝乃率門生

出迎置酒第中於陵坐堂上嗣復與諸生坐兩序始於陵在考功擢浙東觀察李師稷及第時亦在焉人謂楊氏上下門生時以為榮

談苑淮南張似知貢舉進士試天雞弄和風似但以文選中詩句為題未嘗詳究也有進士白試官云爾雅韃天雞韃天雞有二未知孰是似大驚不能對亟取爾雅檢釋虫有韃天雞小虫

黑身赤頭一名莎鷄釋鳥有翰赤羽逸周書曰文翰若彩雞成

王時蜀人獻之江南士人深於學問有如此者

闕中記陳蜀唐乾符五年及第

初夢神人謂曰當在山下水邊及第其主司乃是崔滄豈非前定乎

談錄李文正公嘗言其座主王仁裕知貢舉時已年高有數子

皆早亡諸孫並幼諸生至門必延於中堂與夫人偶坐受諸生

拜一如兒孫禮然備酒饌命諸生至於餅餌羹臠之物皆公與

夫人親手調品忽一日生徒畢出一詩牋曰二百一十四門生

春風初長羽毛成哀翁漸老兒孫小它日知誰畧有情

撫言便承宣一

主文後六七年方授金紫時門生李石先於內庭恩賜矣承宣拜命之磐以所服紫袍金魚拜獻座主

筆談劉幾程試累為第一驟為怪險之語翕然成風歐公深惡

之有舉人論曰天地軋萬物萬聖人發公曰此必劉幾戲續曰

